

Monico Atienza,
Dakilang Pantas ng Kilusang
Pambansa-Demokratiko

**CONGRESS OF TEACHERS/EDUCATORS FOR
NATIONALISM AND DEMOCRACY (CONTEND)**

Ipinapaabot ng Congress of Teachers/Educators for Nationalism and Democracy (CONTEND) ang aming taos-pusong pakikiramay sa pagpanaw ni Prop. Monico M. Atienza. Ikinalulungkot namin na sanhi ng kaniyang malubhang karamdaman ay napaikli ang buhay ni Ka Nic na marami pa sanang nagawa kung hindi lamang dahil dito. Ngunit masasabing maraming nabuhay at nabubuhay nang higit na mahaba na hindi man lang nakagawa ng kahiraso ng kaniyang naiambag sa pakikibaka ng sambayanan para sa tunay na kalayaan at demokrasya.

Nagniningning ang mga taon ng kaniyang pagkilos bilang mapangahas na lider aktibista at ang kaniyang naging napakahalagang papel sa pagpapalakas at pagpapalawak ng kilusang kabataan at mag-aaral sa Pilipinas. Nagniningning ang kaniyang mga taon sa andergawnd at ang kaniyang matagumpay na pag-igpaw sa mga pinagdaanan niyang matinding pagpapahirap sa kamay ng mga pasistang militar. Nagniningning ang kaniyang mga taong iginugol bilang masigasig na aktibistang guro sa loob at labas ng Unibersidad ng Pilipinas at sa loob at labas ng kaniyang mga itinuturong subjek sa wika at Araling Pilipino.

Isa sa mga paborito niyang ibahagi sa kaniyang mga mag-aaral ang isang kuwentong-bayang mula sa Tsina hinggil sa matandang hangal na hindi nawalan ng loob kaharap ng halos imposibleng gawain ng pagpapatag ng gahiganteng mga bundok. Tulad ng ibang nakakilala sa kaniya, marahil ay nakita ni Ka Nic ang kaniyang sarili sa “matandang hangal” na hindi kailanman bumitiw sa prinsipyo at walang tinag na pinanghawakan ang paninindigan sa kabila ng hindi masukat na pagsubok at hirap. Sa kuwentong ito ay may tauhan ding tinaguriang “dakilang pantas” na hindi makaunawa sa katigasan ng ulo ng matandang hangal. Naniwala ang pantas na ito na ang pinakarealistiko at pinakapragmatikong hakbang ay talikdan na ang kabaliwan ng matandang hangal at gawin na lamang ang reasonable at posible. Sa makitid at limitadong pag-iisip ng tinaguriang dakilang pantas ay makikita kung sino talaga sa dalawa ang maituturing na dakilang pantas.

Para sa lahat ng aktibistang nakasalamuha si Ka Nic, kinatawan niya kapuwa ang isang “matandang hangal” at ang isang tunay na “dakilang pantas.” Magkasanib sa kaniya ang matatag na paninindigan at matalas na pagsusuri, pananatili at pagbabago, kabaitan at katapangan.

Hindi kailanman malilimot ang kaniyang pinanghawakang mga prinsipyo at ang kaniyang katatagan sa pagtataguyod ng mga ito. Hindi kailanman malilimot ang kaniyang itinurong mga aral. Mananatiling buhay siya lagi sa aming utak, puso, at kamao.

Binasa sa unang gabi ng pagpaparantal kay Ka Nic, Church of the Holy Sacrifice, Unibersidad ng Pilipinas sa Diliman, 6 Disyembre 2007